

## Headlines

- 1 राष्ट्रपति द्रौपदी मुर्मू होर अपने त्रऊं दिनें दे दौरे उप्पर आकलैंड पुज्जियां।
- 2 उप-राष्ट्रपति जगदीप धनखड़ होरें जोर देइयै आखेआ ऐ जे भारत दऊ बरें दे अंदर विश्व दी त्री बड्डी अर्थ बवस्था बनिये उभरोग।
- 3 गृह मंत्रालय नै जम्मू-कश्मीर पुलस महानिदेशक दा बादू कार्यभार साम्भा'रदे डीजीपी आर.आर स्वैन होरें गी केंद्र शासित प्रदेश जम्मू-कश्मीर दा फुल टाइम डीजीपी नियुक्त कीता ऐ।
- 4 जम्मू-कश्मीर पुलसै दे सुरक्षा सीगे नै एम.ए स्टेडियम, जित्थे स्वतंत्रता दिवस समारोह आयोजित कीता जाग, दी सुरक्षा जिम्मेदारी सांभी लेई ऐ।

<><><><><><>

## Prez.

न्यूजीलैंड दे गवर्नर जनरल डेम सिंडी किरो हुंदे साद्दे पर राष्ट्रपति द्रौपदी मुर्मू न्यूजीलैंड दे दऊं दिनें दे दौरे पर आंकलैंड पुज्जी गेदियां न। एहू 8एं बरें परैंत कुसै राष्ट्रपति दी न्यूजीलैंड जात्तरा होग। अपने दौरे दरान राष्ट्रपति होर गवर्नर जनरल किरो ते प्रधानमंत्री क्रिस्टोफर लक्सन हुंदे नै दपक्खी बैठकां करंगन। राष्ट्रपति होर वेलिंगटन च अंतरराष्ट्री शिक्षा सम्मेलन गी बी संबोधित करंगन। इस सम्मेलन च भारत मानजोग परौहने दे तौर पर शिरकत करै करदा ऐ। राष्ट्रपति होर आंकलैंड च भारतीय समुदाय दे लोकें कन्नै ते भारत दे दोस्तें कन्नै बी गल्लबात करंगन। उंदे इस सरकारी दौरे कन्नै केई सारे खेत्तरें च भारत ते न्यूजीलैंड दे सरबंधें च होर मजबूती औने दी मेद ऐ।

<><><><><><>

## VP-PM Handloom

उपराष्ट्रपति जगदीप धनखड़ होरें जोर देइयै आखेआ ऐ जे भारत पक्क गै अगले दऊं बरें अंदर दुनिया दी त्री सब्बनें शा बड्डी अर्थ बवस्था बनी जाहगा। अज्ज नमीं दिल्ली च हथखड्डी सरबंधी 10में अंतरराष्ट्री ध्याडे आले इक कार्यक्रम दरान भाषण दिंदे होई उपराष्ट्रपति होरें आखेआ जे मुल्ल तरक्की करै करदा ऐ ते इस तरक्की गी रोकेया नेई जाई सकदा। आर्थिक राष्ट्रवाद दी हिमायत करदे होई री धनाखड़ होरें आखेआ जे एहू देसै दे विकास लेई अत्त जरूरी ऐ। उपराष्ट्रपति होरें आखेआ जे प्रधानमंत्री नरेंद्र मोदी होरें बोकल फॉर लोकल दा मंत्र दित्ता ऐ ते हथखड्डी उत्पाद इस अभियान दा अहम हिस्सा न। उनें लोकें गी हथखड्डी उत्पादें दा इस्तेमाल करने दी गुजारश कीती। उनें आखेआ जे एहूदे लेई सैहकारी खेत्तर इक नतीजाकुन भूमिका निभाई सकदा ऐ। इस मौके पर उनें हथखड्डी बुनकरें गी संत कबीर पुरस्कार ते राष्ट्री हथखड्डी पुरस्कार भेंट कीते। एहूदे शा पैहले कपडा मंत्री गिरिराज सिंह होरें आखेआ जे हथखड्डी दा खेत्तर टिकाऊ ते ग्रामीण रोजगार गी बढ़ावा दिंदा ऐ। उनें आखेआ जे आलमी सतह दे हथखड्डी कारोबार च भारत 90 फीसदी योगदान दिंदा ऐ।

<><><><><><>

## JK-Amarnath Yatra

श्री अमरनाथ जी दी इस बरे दी जात्तरा दरान अजें तोहडी 5 लक्ख शा मते श्रद्धालुएं बाबा बर्फानी जी दे दरबार च मत्था टेकी लैता ऐ। आकाशवाणी जम्मू संवाददाता एन. गुलशन रैना दी रिपोर्ट मुजब जंदी 29 जून गी अमरनाथ जात्तरा शुरू होने थमां लेइयै हुनै तगर 5 लक्ख 105 श्रद्धालुएं शिवें दे हिमलिंगम रूप दे दर्शन करी लैते न। इस बरे श्रद्धालुएं दे आंकडे नै पिछले सब्बै रिकार्ड त्रोडी दित्ते न। पहलगाम रस्ते पर हाल दिएं बरखें करी हुन लोडचदे रख-रखाव आले कम्में दे मद्देनजर यात्रा बालटाल आले रस्तेया जारी रौहग ते एहूदे लेई लोडचदे प्रबंध यकीनी बनाए गे न। 52एं दिनें दी एहू जात्तरा 19 अगस्त गी रक्खड पुन्नेया आले दिन सम्पन्न होई जाहगा।

<><><><><><>

## Kousar

अज्ज बडुलै चऊं दिन चलने आहली कौसर नाग यात्रा ते छडी मुबारक गी धार्मिक श्रद्धा ते हर्षोल्लास कन्नै रियासी थमां झंडी दस्सिये रवाना कीता गेआ। एहूदे बारै जानकारी दिंदे होई रियासी दे तहसीलदार जेडे जे यात्रा दे नोडल् अफसर बी हैन, होरें आखेआ। इक्क साधु नै बी स्हाडे संवाददाता कन्नै गल्ल करदे होई दस्सेया।

<><><><><><>

## DC-Poonch

पुंछ दे डिप्टी कमिशनर यासिन एम. चौधरी होरें जल जीवन मिशन दे प्रबंध निदेशक ते जल शक्ति विभाग दे चीफ इंजीनियर हुंदे कन्नै मीटिंग लाइयै पुंछ जिले च जल जीवन मिशन दी कम्म-कारवाइयें दा जायजा लैता। मीटिंग दा उद्देश्य स्कीम दी मौजूदा स्थिति दा जायजा लैना हा। इस दौरान समें उप्पर बकाया कम्में गी पूरा करने ते कम्म दी रफ्तार बधाने लेई बी आखेआ। स्हाडे संवाददाता कन्ने गल्ल करदे होई जल शक्ति विभाग दे सुपिंरटेण्डेंट इंजीनियर मोहम्मद ताज चौधरी होरें गलाया।

<><><><><><>

## LS-Renewable

नमीं ते अक्षय उर्जा मंत्री प्रहलाद जोशी होरें आखेआ ऐ जे अक्षय उर्जा दी समर्थ 203 गीगावाट तगर पुज्जी गई ऐ। लोकसभा च सोआलें दे समें दरान जिमनी सोआलें दा परता दिंदे होई श्री जोशी होरें आखेआ जे 115 गीगावाट नवीकरणीय उर्जा दी बाद्दू समर्थ हासल करने दी प्रक्रिया बक्ख-बक्ख चरणें च ऐ। उनें आखेआ जे बरे 2014 च अक्षय उर्जा दी समर्थ तकरीबन 76 गीगावाट ही। जोशी होरें आखेआ जे अक्षय उर्जा दी पैदावार बधाने आस्तै सरकारै केई पैहलकदमियां कीतिआं न। जोशी होरें दस्सेया जे ग्रीन हाइड्रोजन मिशन ते खुल्ले समुंदरै च कंडु थमां किश दूरी पर पवन उर्जा दा पता लाने दा कार्यक्रम देसै दी अक्षय उर्जा नीति च जोडे गेदे नमें आयाम न।

<><><><><><>

## MEA-BIMSTEK Summit

विदेश राज्यमंत्री पबित्रा मारगरेटा होरें आखेआ ऐ जे भारती उद्योग परिसंघ-सी.आई.आई ते बिमस्टेक बपार मंच सार्वजनिक ते निजी खेत्तरें, नीतियां बनाने आलें ते विचारकें, उद्योग ते शिक्षा जगत, बपार संघें ते व्यक्तिगत निवेशकें दे महत्वपूर्ण प्रतिनिधिएं गी इक्के मंच पर आह्ना करदा ऐ। नमीं दिल्ली च कल शिखर सम्मेलन च श्री मारगरेटा होरें आखेआ जे महिलाएं गी बपार दी मुख धारा च आह्नना शिखर सम्मेलन दी कार्यसूची दा हिस्सा ऐ। उनें आखेआ जे एहू प्रधानमंत्री नरेंद्र मोदी हुंदे विकास दे नजरिये मुजब ऐ। उनें आखेआ जे महिलाएं दे नेतृत्व आला विकास बी भारत दी जी-20 अध्यक्षता दा इक अननुद अंग ऐ ते टिकाऊ विकास लेई अत्त लाजमी ऐ। मारगरेटा होरें आखेआ जे बिमस्टेक खेत्तर च दुनिया दी तकरीबन 25 फीसदी आबादी ऐ जेहड़ी कुदरती ते मनुक्खी दौनें किस्मै दे साधनें-वसीलें कन्नै लैस ऐ। मंत्री होरें आखेआ जे बिमस्टेक भारत लेई खास थाहर रक्खदा ऐ ते एहू स्हाडी नीतिएं दे केंद्र च ऐ।

<><><><><><>

## MHA

गृह मंत्रालय नै अज्ज पुलस महानिदेशक आर.आर स्वैन होरेंगी जेडे हूनै तगर जम्मू पुलस दे महानिदेशक दा बाद्दू कार्यभार साम्भा रदेहे, उनेंगी हून जम्मू-कश्मीर दा फुल टाइम डीजीपी नियुक्त कीता ऐ। आकाशवाणी जम्मू संवाददाता नै जानकारी दिती ऐ जे आर.आर स्वैन होर मौजूदा समें च जम्मू-कश्मीर पुलस दे महानिदेशक दा बाद्दू कार्यभार साम्भरदे न। गृह मंत्रालय दे हुक्म मुजब स्वैन हुंदी एहू नियुक्ति तदूं थमां लागू मन्नी जाग जदूं थमां उनें एहू कार्यभार साम्भेया हा ते एहू 30 सितंबर 2024 यां फही अगले हुक्मै तौड़ी लागू रौहगा।

<><><><><><>

## Security-ID JK

पुलिस दे सुरक्षा सीगे नै जम्मू च स्वतंत्रता दिवस समारोह दा आयोजन थाहर एम.ए स्टेडियम दी सुरक्षा जिम्मेवारी सांभी लेई ऐ। आकाशवाणी दे जम्मू संवाददाता नै जानकारी दिती ऐ जे खित्ते च बडे मते खतरे गी दिखदे होई ते हाल च इक्क दे बाद इक्क होए दे आतंकी हमले गी दिक्खदे होई पुलस दे सुरक्षा सीगे नै समारोह आहली थाहर ते एहूदे नेडे सुरक्षा दे निगर बंदोबस्त कीते न। सुरक्षा सीगे इलाके उप्पर पूरा नियंत्रण करी लैता ऐ ते आम माहनू दी स्टेडियम च औने दी मनाही करी दिती ऐ। गड्डियें दी तलाशी लैती जा रदी ऐ ते उनें लोकें गी गै स्टेडियम च औन दित्ता जा रदा ऐ जिंदे कोल सुरक्ष कार्ड मौजूद न।

<><><><><><>

## Search-Operation

अज्ज दुए दिन बी उधमपुर जिले दी उच्चियें धारें उप्पर छपे दे आतंकवादियें गी फगडने लेई तपाशी अभियान जारी ऐ। स्हाडे संवाददाता नै जानकारी दिती ऐ जे पुलस, सेना ते सी.आर.पी.एफ नै बसंतगढ दे खनेड इलाके च सांझा तलाशी अभियान चलाया ऐ। तोआई सुरक्षाबलें राजौरी जिले दे कालाकोट दे दिर गाला जंगलें च दऊं आतंकियें, जिंदे च इक घायल ऐ दे छप्पने दी सूह थोने मगरा उत्थे तलाशी अभियान शुरू करी दिते दा ऐ। घायल आतंकी मन्नेया जा रदा ऐ जे हाल च गै सुरक्षाबलें कन्ने गुंडा ख्वास ग्रां च भखे दे टाक्करे च जख्मीं होई गेआ हा ते कुसा चाल्ली नस्सने च कामयाब रेआ हा।

<><><><><><>

## Police-JK

जम्मू-पुलस दे साइबर सेल नै आई.टी रिफंड बारै जानकारी देने आहले स्नेहे बारै आम लोकें गी सावधान कीता ऐ। आकाशवाणी दे जम्मू संवाददाता दी रिपोर्ट मुजब इक सलाह च पुलस नै लोकें गी आई.टी रिफंड दे सरबंध च कुसा लिंक पर क्लिक करने उप्पर या कुसा नंबर उप्पर काल करने शां बचने दी सलाह दिती ऐ। पुलस नै आखेआ ऐ जे इस चाल्ली दे स्नेहे धोखाधडी दे इरादे कन्ने कीते जंदे न ते लोकें गी इनें स्नेहें गी नजरअंदाज करना लोडचदा ऐ। लोकें गी सलाह दिती गई ऐ जे इस सरबंध च ओह कोई बी जानकारी साइबर क्राइम दे टोल फ्री नंबर 1930 उप्पर ते वेबसाइट [www.cybercrime.gov.in](http://www.cybercrime.gov.in) उप्पर जाइये देई सकदे न।

<><><><><><>

## RS-PMKVY

सरकारै आखेआ ऐ जे अजें तोहडी प्रधानमंत्री कौशल विकास योजना तैहत 1 करोड 48 लक्ख मेदवारें गी सिखलाई दिती जाई चुकी दी ऐ। एह योजना बरे 2015 च रम्भी गई ही। राज्यसभा च सोआलें दे समें दरान जिमनी सोआल दा परता दिंदे होई कौशल विकास ते उद्यमिता दे केंद्री राज्यमंत्री जयंत चौधरी होरें आखेआ जे प्रधानमंत्री कौशल विकास योजना दे चौथे गेड तैहत नौजवानें लेई इलेक्ट्रिनिक्स ते हार्डवेयर, कपडा, राई-बाई ते साज-समेयान दे खेत्तर सब्बने शा मते पसंदीदा न।

<><><><><><>

## LS-Poverty

सरकारै आखेआ ऐ जे मुलख थमां गरीबी हटाने लेई बक्ख-बक्ख गैह पुटियां जा'रदियां न। लोकसभा च इक लिखित परते च आंकडे ते कार्यक्रमें दी अमल आवरी सरबंधी केंद्री राज्यमंत्री राव इंद्रजीत सिंह होरें आखेआ जे नीति आयोग दी रिपोर्ट मुजब 2013-14 थमां 2022-23 बरे दौरान तकरीबन 25 करोड लोकें गी गरीबी दे दायरे शा बाहर लेआंदा गेआ ऐ। उत्तर प्रदेश दे 5 करोड 93 लक्ख, बिहार दे 3 करोड 77 लक्ख, मध्य प्रदेश दे 2 करोड 3 लक्ख ते राजस्थान दे 1 करोड 87 लक्ख लोकें गी बहु आयामी गरीबी दे दायरे थमां बाहर लेआंदा गेआ। नीति आयोग दा बहु आयामी गरीबी सरबंधी सूचकांक स्वास्थ्य, शिक्षा ते जीन जीने दे तौर-तरीकें दा जायजा लेइयै गरीबी दा अंदाजा पेश करदा ऐ ते लोकें दी गरीब ते ओहदे शां निजात पाने दी रफ्तार गी मापदा ऐ।

<><><><><><>

## LS-IT

सरकार सूचना क्रांति दा लाहू हर इक नागरिक तगर यकीनी बनाने लेई देश दे टियर-2 ते टियर-3 शहरें तगर सूचना प्रौद्योगिकी उद्योग गी लेई जाने दी योजना बना'रदी ऐ। लोकसभा च इक सवाला दा परता दिंदे होई इलेक्ट्रिनिक ते सूचना प्रौद्योगिकी राज्यमंत्री जितिन प्रसाद होरें आखेआ जे सरकार नै 65 साफ्टवेयर टेक्नोलाजी पार्क्स ऑफ इंडिया केंद्रें दी स्थापना कीती ऐ ते इंदे शा 57 टियर-2 ते टियर-3 शहरें च स्थापित कीते गए न। उनें आखेआ जे सरकार ग्रामीण भारत च कनेक्टिविटी बधाने ते सूचना प्रौद्योगिकी केंद्र स्थापित करने लेई होर मते हीले करोग। प्रसाद होरें आखेआ जे आई.टी सेक्टर च 54 लक्ख रोजगार दे मौके पैदा कीते गए जिंदे शा 37 फीसदी नौकरियें च महिलाएं दी हिस्सेदारी ऐ।

<><><><><><>